

# Uvodnik

Mislim da neću reći ništa novo kada ustvrdim da je imamski posao esencijalni element kvalitetnog funkcioniranja Islamske zajednice. To je osnova našeg ukupnog rada, a sve drugo je nadgradnja i podrška djelatnosti imama. Nedavno je u jednom od svojih intervjua reisu-l-ulema Husein-efendija Kavazović uporedio posao imama s poslom domaćice, tvrdeći da se posao imama i posao domaćice prepoznaju i cijene jedino kada se ne rade. Uistinu, imamski poziv ima svoje izazove koje moramo anticipirati kako bismo pomogli imamu u njegovoj misiji. Stoga, imame moramo zaštititi od lokalnih moćnika koji iz raznoraznih razloga nasrću na imamski autoritet pa i puku egzistenciju. Valja insistirati na njihovom boljem materijalnom statusu dostojnom značaja uloge koju obavljaju. A prije svega, valja nam bdjeti nad kvalitetnim obrazovanjem imama, osobito u kontekstu savremenih socijalnih i duhovnih kretanja. Ovdje treba dodati i evidentno usložnjavanje imamske misije i neminovnu diverzifikaciju s obzirom na to da imamski poziv postaje toliko složen da zahtijeva više specijaliziranu i metodološki fokusiranu izobrazbu. Stoga smo u ovom broju nastojali ponuditi radove koji bi u fokus stavili edukaciju imama za evropski prostor i za našu mnogobrojnu dijasporu.

U rubrici *Putokazi* moći ćete pročitati tekst akademika Enesa Karića “Kako o islamu govoriti u Evropi danas”. Autor nudi uvide u mnogostruke diskurse islama prisutne u Evropi današnjice i određene prioritete u definiranju savremenog muslimanskog diskursa.

Rubrika *Intervju* sadrži razgovor s reisu-l-ulemom Islamske zajednice u Bosni i Hercegovini. Reisu-l-ulema Kavazović na koncu svog sedmogodišnjeg mandata odgovara na neka iznimno važna pitanja kako za Islamsku zajednicu i njeno funkcioniranje tako i za državu i sudbinu Bošnjaka u geopolitičkom kolopletu.

Tema broja sasvim usredsređeno bavi se pitanjem obrazovanja imama za evropski kontekst. Prvi tekst u ovoj rubrici potpisuje Muftija ljubljanski prof. dr. Nedžad Grabus “Islam u pluralnom društvu”. Autor se u radu bavi pozicijom i obrazovanjem imama u pluralnom društvu, što je bitna odrednica evropskog kulturnog i političkog prostora, kao i drugim relevantnim tačkama za ovu temu. Prof. dr. Ahmed Alibašić piše o različitim modelima obrazovanja imama u evropskom prostoru s analitičko-kritičkim otklonom spram tih različitih modaliteta. Prof. dr. Nusret Isanović potpisuje rad koji ima ambiciju vraćanja digniteta imama te oslovljava stanovite pretpostavke za kvalitetnije obrazovanje imama za evropski prostor. Dr. Esnaf Begić u radu “Islamsko dušebrižništvo u Njemačkoj: stanje, izazovi i perspektive” tematizira pitanje socijalne dimenzije islama i dušebrižništva kao bitnog a zanemarenog faktora na tom polju. Autor propituje fenomen dušebrižništva, pozicionira ga u njemačkoj zajednici i zatemeljuje ga u islamskoj konstitutivnoj tradiciji. Prof. dr. Safet Bektović u radu “Islamska teologija i obrazovanje imama u Skandinaviji” istražuje iskustvo skandinavskih zemalja u kontekstu obrazovanja imama i razvoja teološke islamske misli u ovom dijelu Evrope. Doc. dr. Mevludin Dizdarević u radu pod naslovom “Kulturna inteligencija i njen značaj za misijsko djelovanje imama” istražuje značaj kroskulturnih kompetencija kao iznimno važnih znanja i vještina u globalnom svijetu. Dr. Senad Čeman potpisuje rad “Institucionalni pristup razmatranju savremenih fikhskih pitanja u Zapadnom kontekstu”. Autor nudi historijsku perspektivu donošenja fetvi na izazove koji su stajali pred različitim zajednicama. Također, on propituje metodologije nuđenja savremenih pravnih rješenja i nudi institucionalni pristup naspram vaninstitucionalnog koji je rasterećen od odgovornosti i stoga najčešće pogrešan. Doc. dr. Sedad Dedić i doc. dr. Ajdin Husein-spahić nas susreću s nekim pitanjima sadržaja samog obrazovanja imama. Naime, autori istražuju važnost poznavanja historijskopravnog i ustavnopravnog teksta i konteksta za uspješan rad imama. Pokazalo se da su mnogi problemi s kojima su se susretale muslimanske zajednice i pojedinci mogli biti riješeni adekvatnim uvidima u pravnu tradiciju i praksu određenih zemalja.

*Hfz. Mevludin Dizdarević*